

**Sumáriu Kazu**  
**Tribunál Judisiál Primeira Instánsia Oekusi**  
**Jullu 2024**

**Afirmasaun:** Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

**A. Sumáriu prosesu julgamentu kazu iha Tribunál Judisiál Primeira Instánsia Oekusi**

**1. Totál kazu ne'ebé JSMP monitoriza: 16<sup>1</sup>**

Artigu	Tipu kazu	Númeru
Artigu 145 Kódigu Penál (KP), konjuga ho artigu 2, 3, no 35(b) no 36 (LKVD)	Ofensa ba integridade física simples ho natureza violénsia doméstika (VD) no tipu ilísitu sira kona-ba violénsia doméstika	9
Artigu 154 KP	Maus-tratus ba kónjuje ho natureza VD	1
Artigu 177 (1) KP	Abuzu seksuál ba menór	2
Artigu 172 KP	Violasaun seksuál	1
Artigu 171 KP	Koasaun seksuál	1
Artigu 316 KP	Kontrabandu	1
Artigu 157 KP	Ameasa	1
<b>Totál</b>		<b>16</b>

**2. Totál desizaun ne'ebé JSMP monitoriza : 12**

Tipu pena	Artigu	Númeru
Prizaun no indemnizasaun sivíl	Artigu 66 KP no Artigu 69 (a) KP	1
Suspensaun ba prizaun nia ezekusaun	Artigu 68 KP	3
Admoestasaun	Artigu 82 KP	2
Multa	Artigu 67 KP	4
Omologa pedidu dezisténsia keixa	Artigu 262 (2) Kódigu Prosesu Penál	1
Absolve	-	1
<b>Totál</b>		<b>12</b>

**3. Total kazu sira ne'ebé kontinua prosesu tuir JSMP nia monitorizasaun: 4**  
**Deskrisaun sumáriu julgamentu ba desizaun kazu sira**

<sup>1</sup> Totál kazu 16 ne'e la representa totál kazu ne'ebé Tribunál Judisiál Primeira Instánsia Oekusi julga iha fulan Jullu 2024

## **1. Krime kontrabandu**

Nú. Prosesu : 0302/22.OESIC  
Kompozisaun Tribunál : Kolektivu  
Juis : Dr. Benjamin Barros, Dr. Argentinho Luisa  
Maria Nunes no Dr. José Quintão  
Prokuradór : Dr. Claodino do Rosario  
Defeza : Dr. Afonso Gomes Fatima  
Desizaun : Pena prizaun tinan 2 suspende ba tinan 2

Iha 04 Jullu 2024, Tribunál Judisiál Primeira Instansia Oekusi prezide leitura akordaun ba krime kontrabandu ne'ebé envolve arguidu Francisco Tolan ho arguida Sonia Colo hasoru Estadu RDTL, iha Rejiaun Administrativa Espesiál Oekusi Ambeno (RAEOA).

### **Akuzasaun Prokuradór**

Prokuradór akuza katak iha 21 Dezembru 2022, maizumenus iha oras tuku 09:30 dadeer, arguidu ho arguida konduz motorizada marka honda supra X kor metan, momentu ne'eba Unidade Polísia Fronteira (UPF) halo hela patrollamentu iha area Tono nian, halo pasa revista hetan sigaru surya-16 slop 20, sigaru Gaze slop 20, sasan ilegal sira ne'e arguidu ho arguida sosa iha area fronteira Indonézia nian. Arguidu ho arguida importa sasan tuir dalan ilegal ho objetivu atu labele selu taxa ba Estadu RDTL liuhosi diresaun Alfândega.

Prokuradór akuza arguidu ho arguida kontra artigu 316 KP kona-ba krime kontrabandu ho moldura penál tinan 2 to'o tinan 6 ka multa.

### **Produsaun ba prova sira**

Iha prosesu julgamentu, arguidu ho arguida sira konfesa faktu hotu ne'ebé hakerek ona iha akuzasaun prokuradór nian. Depoisde akontesimentu arguidu ho arguida arrepende ba sira nia hahalok, promete sei larepete hikas sira nia hahalok ne'e iha futuru, foin primeiravés mai hatan iha tribunál, arguidu ho arguida sira hanesan feen ho la'en, iha oan na'in tolu, serbisu hanesan to'os na'in no hanesan dona de casa laiha rendimentu fiksi kada fulan.

Depoisde rona deklarasaun hosi arguidu no arguida, prokuradór husu ba tribunál atu presinde tiha testemuña nia depoimentu tanba arguidu no arguida konfesa faktu hotu iha akuzasaun, nune'e prova ne'ebé presiza suficiente ona. Relasiona ho pedidu ne'e, defeza konkorda prokuradór nia pedidu. Tribunál bazeia ba pedidu ne'e konklui hodi presinde testemuña nia depoimentu.

### **Alegasaun finál**

Prokuradór konsidera arguidu provadu prátika aktu krime kontrabandu tuir faktu sira hotu iha akuzasaun. Prokuradór reforsa liután katak krime kontrabandu dala barak ona tribunál halo julgamentu maibé krime ne'e sei kontinua akontese. Tanba ne'e, husu ba tribunál atu aplika pena prizaun tinan rua suspende nia ezekusaun ba tinan tolu.

Entretantu defeza haktuir katak arguidu sira konfesa faktu hotu iha akuzasaun, arrepende sira nia hahalok no promete sei la komete tan krime hanesan iha futuru. Defeza reforsa liután katak depoisde akontesimentu arguidu ho arguida,

sira foin primeiravés mai hatan iha tribunál, arguidu ho arguida sira hanesan feen ho la'en, oan na'in tolu, serbisu hanesan to'os na'in ho dona de casa laiha rendimentu fiksi kada fulan. Tanba ne'e, husu ba tribunál atu aplika pena ne'ebé adekua tuir arguidu ho arguida sira nia sala.

### **Desizaun**

Depoisde avalia faktu sira hotu no tribunál konsidera hahalok arguidu ho arguida sira nian priense duni elementu krime kontrabandu bazeia ba konfisaun arguidu ho arguida sira nian durante iha produsaun ba prova no arguidu ho arguida sira nia hahalok ne'e konsideradu kontra krime kontrabandu.

Bazeia ba faktu prova hirak ne'e hotu no tetu mós ba aktu krime ne'ebé mak hatodan no hakaman arguidu ho arguida sira nia responsabilidade kriminál. Nune'e tribunál konklui prosesu ne'e no kondena arguidu ho arguida sira ho pena prizaun tinan rua suspende ba tinan rua.

## **2. Krime ofensa ba integridade física simples ho natureza VD**

Nú. Prosesu	: 0158/23.OESIC.
Kompozisaun Tribunál	: Singulár
Juis	: Dr. Benjamin Barros
Prokuradór	: Dr. Claodino do Rosario
Defeza	: Dr. Afonso Gomes Fatima
Desizaun	: Pena multa US\$60.00

Iha 09 Jullu 2024, Tribunál Judisiál Primeira Instansia Oekusi prezide julgamentu ba krime ofensa ba integridade física simples ho natuerza VD ne'ebé envolve arguidu MTS hasoru nia feen, iha RAEOA.

### **Akuzasaun Prokuradór**

Prokuradór akuza katak iha 24 Juñu 2023, maizumenus iha oras tuku 20:00 kalan, arguidu ho lezada diskuti malu kona-ba sira nia oan ne'ebé maka moras, nune'e arguidu tuku dala ida iha lezada iha nia matan parte karuk, tuku dala ida iha lezada hasan parte karuk, tuku dala ida iha lezada nia kanuruk. Konsekuensia hosi arguidu nia konduta ne'e rezulta lezada sofre moras. kazu ne'e aneksa hamutuk ho relatóriu médiku hosi Ospital Referál Oekusi no fotografia sira hasai hosi polisia-VPU kona-ba aktu violénsia ne'e.

Prokuradór akuza arguidu kontra artigu 145 KP kona-ba krime ofensa ba integridada física simples ho moldura penál to'o tinan 3 prizaun ka multa, konjuga ho artigu 2, 3 (a), 35(b) no 36 LKVD.

### **Produsaun ba prova sira**

Iha prosesu julgamentu arguidu konfesa faktu hotu iha akuzasaun, arrepende ninia hahalok, arguidu mós deklara katak husu ona deskulpa ba lezada moris hamutuk nafatin hanesan feen ho la'en, promete sei larepete tan iha futuru, foin primeiravés mai hatan iha tribunál no iha oan na'in haat no serbisu hanesan badaen laiha rendimentu fiksi kada fulan.

Alende ne'e, lezada kontinua konfirma faktu sira iha akuzasaun no konfirma mós arguidu nia deklarasaun, arguidu husu ona deskulpa ba lezada no di'ak

malu ona no moris hamutuk nafatin hanesan feen ho la'en, laiha tan ona problema.

### **Alegasaun finál**

Prokuradór konsidera arguidu provadu prátika krime tuir faktu sira iha akuzasaun bazeia ba konfisaun arguidu nian no konfirma mós hosi lezada, nune'e atu halo prevensaun ba krime refere, husu ba tribunál atu kondena arguidu ho pena multa.

Entretantu, defeza husu ba tribunál atu kondena arguidu ho pena ne'ebé justu tuir arguidu nia sala ho konsiderasaun sira katak durante iha produsaun ba prova arguidu konfesa integralmente, arrepende ninia hahalok, husu ona deskulpa ba lezada moris hamutuk nafatin hanesan feen ho la'en, promete sei larepete tan iha futuru, foin primeiravés mai hatan iha tribunál no iha oan na'in haat no serbisu hanesan badaen laiha rendimentu fiksi kada fulan.

### **Desizaun**

Depoizde avalia ba faktu hotu tribunál prova katak arguidu tuku dala ida iha lezada iha nia matan parte karuk, tuku dala ida iha lezada hasan parte karuk, tuku dala ida iha lezada nia kanuruk. Konsekuensia hosi arguidu nia konduta ne'e rezulta lezada sofre moras.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena multa US\$60.00, ne'ebé kada loron arguidu sei selu US\$1.00 durante loron 60. Tribunál mós fiksa pena alternativa durante loron 40 prizaun, bainhira arguidu la kumpri pena multa refere.

### **3. Krime ofensa ba integridade fízika simples ho natureza VD**

Nú. Prosesu	: 0019/23.OEPMK.
Kompozisaun Tribunál	: Singulár
Juis	: Dr. Benjamin Barros
Prokuradór	: Dr. Claodino do Rosario
Defeza	: Dr. Afonso Gomes Fatima
Desizaun	: Pena multa US\$60.00

Iha 11 Jullu 2024, Tribunál Judisiál Primeira Instansia Oekusi prezide leitura sentensa ba krime ofensa ba integridade fízika simples ho natureza VD ne'ebé envolve arguidu DA hasoru nia feen, iha RAEOA.

### **Akuzasaun Prokuradór**

Prokuradór akuza katak iha 03 Marsu 2023 maizumenus iha oras tuku 15:00 lokraik, arguidu tuku dala ida iha lezada nia kanuruk, tuku dala ida iha lezada nia kabaas parte loos, tebe dala ida iha lezada nia kidan. Konsekuensia hosi arguidu nia aktu ne'e rezulta lezada sofre moras. Kazu ne'e aneksa hamutuk ho relatóriu médiku hosi Pradet no fotografia sira kona-ba aktu violénsia ne'e hasai hosi Polisia-VPU.

Prokuradór akuza arguidu kontra artigu 145 KP kona-ba krime ofensa ba integridada fízika simples ho moldura penál to'o tinan 3 ka multa, konjuga ho artigu 2, 3 (a), 35(b) no 36 hosi LKVD.

### **Produsaun ba prova sira**

Iha julgamentu, arguidu konfesa integralmente ba faktu hotu iha akuzasaun no deklarata katak arrepende ninia hahalok. Arguidu mós deklarata katak husu ona deskulpa ba lezada, di'ak malu ona, promete sei la repete tan violénsia hasoru lezada. Arguidu hatutan tan katak foin primeiravés halo krime no mai hatan iha tribunál, iha oan na'in tolu, serbisu hanesan to'os nain laiha rendimentu fiksi kada fulan.

Depoizde rona deklarasaun hosi arguidu, prokuradór husu ba tribunál atu presinde tiha lezada nia deklarasaun tanba arguidu konfesa faktu hotu iha akuzasaun, nune'e prova ne'ebé presiza suficiente ona. Relasiona ho pedidu ne'e, defeza konkorda prokuradór nia pedidu. Tribunál bazeia ba pedidu ne'e konklui hodi presinde lezada nia deklarasaun.

### **Alegasaun finál**

Prokuradór konsidera arguidu provadu halo agresaun fízika hasoru lezada tuir faktu sira iha akuzasaun, nune'e arguidu nia hahalok ne'e kostitui ba krime ofensa ba integridade fízika simples ho natureza VD. Prokuradór reforsa liu tán katak basa lezada iha nia matan no seluk tan bele provoka lezada sofre moras maibé arguidu ho hakarak rasik pratika aktu krime hasoru nia feen. Tanba ne'e husu ba tribunál atu kondena arguidu ho pena multa.

Entretantu, defeza husu ba tribunál atu aplika pena ne'ebé adekua ba arguidu tuir nia sala ho konsiderasaun sira katak arguidu konfesa faktu hotu iha akuzasaun, arrepende ninia hahalok, husu ona deskulpa ba lezada, di'ak malu ona no promete sei la repete tan violénsia hasoru lezada, foin primeiravés mai hatan iha tribunál, iha oan na'in tolu, serbisu hanesan to'os nain laiha rendimentu fiksi kada fulan.

### **Desizaun**

Depoizde avalia ba faktu hotu, tribunál prova katak arguidu tuku dala ida iha lezada nia kanuruk, tuku dala ida iha lezada nia kabaas parte loos, tebe dala ida iha lezada nia kidan, rezulta lezada sofre moras.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena multa US\$60.00, ne'ebé kada lora arguidu sei selu US\$1.00 durante lora 60. Tribunál mós fiksa pena alternativa durante lora 40 prizaun, bainhira arguidu la kumpri pena multa refere.

## **4. Krime ofensa ba integridade fízika simples ho natureza VD**

Nú. Prosesu	: 0022/23.OEPMK
Kompozisaun Tribunál	: Singulár
Juis	: Dr. Benjamin Barros
Prokuradór	: Dr. Claudino do Rosario
Defeza	: Dr. Calisto Tout

Desizaun

: Pena prizaun fulan 6 suspende ba tinan 1

Iha 24 Jullu 2024, Tribunál Judisial Primeira Instansia Oekusi prezide leitura sentensa ba kazu ofensa ba integridade física simples ho natureza VD ne'ebé envolve arguidu LO hasoru nia feen, iha RAEOA.

### **Akuzasaun Prokuradór**

Prokuradór akuza katak iha 22 Abril 2023, maizumenus iha oras tuku 17:00 lokraik, iha momentu ne'eba arguidu ho lezada deskute malu kona-ba lezada deskonfia arguidu amante (*selingkuh*) ho feto seluk, nune'e arguidu basa dala ida iha lezada nia kanuruk rezulta lezada sofre moras. Kazu ne'e aneksu hamutuk ho relatóriu médiku husi PRADET no fotografia sira kona-ba aktu violénsia ne'e hasai hosi polísia.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a) 35(b) no 36 LKVD.

### **Produsaun ba prova sira**

Iha julgamentu, arguidu konfesa faktu hotu iha akuzasaun no hatene hahalok hanesan ne'e ladi'ak no bele prejudika lezada nia kanuruk sofre moras. Arguidu deklara katak sira na'in rua hola malu hanesan feen ho la'en iha tinan 2018 to'o agora sira iha oan na'in rua, depoisde akontesementu sira na'in rua dame malu kedas to'o agora nafatin moris hamutuk iha uma ida hanesan feen ho la'en, arguidu serbisu hanesan to'os na'in laiha rendimentu fiksi kada fulan, promete sei larepete hikas hahalok hasoru lezada ka ema seluk iha futuro.

Depoisde rona deklarasaun hosi arguidu, prokuradór husu ba tribunál atu presinde tiha lezada nia deklarasaun tanba arguidu konfesa faktu hotu iha akuzasaun, nune'e prova ne'ebé presiza suficiente ona. Relasiona ho pedidu ne'e, defeza konkorda prokuradór nia pedidu. Tribunál bazeia ba pedidu ne'e konklui hodi presinde lezada nia deklarasaun.

### **Alegasaun finál**

Prokuradór konsidera arguidu nia hahalok ne'e livre, deliberada no konsientemente, konkretiza hodi hamoras lezada nia saúde atraves hosi meus sira hanesan deskreve ona iha akuzasaun. Tanba ne'e, prokuradór husu ba tribunál atu kondena arguidu ho pena prizaun fulan tolu suspende ba tinan ida.

Entretantu, defeza solisita ba tribunál atu aplika pena ne'ebé justu ba arguidu ho konsiderasaun katak arguidu konfesa faktu hotu iha akuzasaun, kolabora di'ak ho tribunál, hola malu hanesan feen ho la'en iha tinan 2018, foin primeiraves baku lezada no mai hatan iha tribunál, oan na'in rua, depoisde akontesementu sira na'in rua kontinua dame malu kedas to'o agora nafatin moris hamutuk iha uma ida hanesan feen ho la'en, arguidu serbisu hanesan to'os na'in laiha rendimentu fiksi kada fulan, promete katak sei larepete hikas hahalok ne'e iha futuro hasoru lezada ka ema seluk.

**Desizaun**

Depoisde avalia faktu hotu tribunál prova katak arguidu basa dala ida iha lezada nia kanuruk rezulta lezada sofre moras.

Bazeia ba faktu provadu sira ne'e no tetu mós ho sirkunstánsia atenuante sira ne'ebé haleu krime ne'e, nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

## **5. Krime ameasa**

Nú. Prosesu : 0175/23.OESIC  
Kompozisaun Tribunál : Singulár  
Juis : Dr. Benjamin Barros  
Prokuradór : Dr. Claodino do Rosario  
Defeza : Dr. Afonso Gomes Fatima  
Desizaun : Omologa pedidu dezisténsia keixa

Iha 25 Jullu 2024, Tribunál Judisiál Primeira Instánsia Oekusi prezide julgamentu tentativa konsiliaun ba krime ameasa ne'ebé envolve arguidu Francisco Colo nu'udar Xefe Suku Costa hasoru lezadu Carlito Colo, iha Aldeia Oesono, Suku Costa, Sub-rejiaun Pante-makasar, iha RAEOA.

### **Akuzasaun Prokuradór**

Prokuradór akuza katak iha 18 Jullu 2023, maizumenus iha oras tuku 09:00 dadeer, antes ne'e arguidu ho lezadu iha dezentendimentu ba malu, nune'e arguidu ameasa lezadu dehan "*to'o loron ida ema sei baku ó*" rezulta lezadu sente ta'uk hodi ba apresenta keixa iha polísia.

Prokuradór akuza arguidu kontra artigu 157 KP kona-ba krime ameasa ho moldura penál to'o tinan 2 ka multa.

### **Produsaun ba prova sira**

Bazeia ba artigu 262 KPP kona-ba tentativa ba konsiliaun ba kazu krime sira ho natureza semi-públiku, nune'e antes tama ba prosesu produsaun ba prova sira, juis husu ba parte sira atu halo tentativa konsiliaun.

Iha prosesu tentativa konsiliaun ne'e, arguidu rekoñese katak ameasa lezadu tuir duni faktu sira iha akuzasaun maibé arguidu nu'udar xefe suku husu ona deskulpa no promete sei larepete hikas nia hahalok ne'e hasoru lezadu no sira na'in rua mós hakarak dame malu de'it perante iha tribunál nia oin, nune'e lezadu ho hakarak rasik husu ba tribunál atu deziste tiha nia keixa kontra arguidu sein kondisaun ruma.

### **Alegasaun finál**

Prokuradór no defeza konkorda ho parte rua nia akordu ne'e no husu ba tribunál atu omologa prosesu ne'e.

### **Desizaun**

Bazeia ba akordu husi parte sira no pedidu dezisténsia keixa hosi lezadu, nune'e tribunál konklui prosesu ne'e no omologa pedidu dezisténsia keixa kontra arguidu hosi primeira instansia ne'e.

## **6. Krime ofensa ba integridade fízika simples ho natureza VD**

Nú. Prosesu : 0005/24.OEPMK  
Kompozisaun Tribunál : Singulár  
Juis : Dr. Arjentinho Luisa Maria Nunes  
Prokuradór : Dr. Mateus Nesi  
Defeza : Dr. Afonso Gomes Fatima  
Desizaun : Pena multa US\$30.00

Iha 25 Jullu 2024, Tribunál Judisiál Primeira Instánsia Oekusi prezide leitura sentensa ba krime ofensa ba integridade fízika simples ho natureza VD ne'ebé envolve arguidu DQ hasoru nia feen, iha RAEOA.

### **Akuzasaun Prokuradór**

Prokuradór akuza katak iha 01 Janeiro 2024, maizumenus iha oras tuku 22:00 kalan, arguidu basa dala rua iha lezada nia hasan parte karuk rezulta lezada sofre moras. Aktu ne'e akontese bainhira arguidu sai ba hato'o boas-festa tinan foun nian no fila ba uma ho kondisaun lanu, nune'e diskute malu ho lezada. Kazu ne'e aneksa hamutuk ho relatóriu médiku hosi PRADET no fotografia hosi polísia-VPU kona-ba aktu violénsia ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 prizaun ka multa, konjuga ho artigu 2, 3(a), 35(b) no 36 LKVD.

### **Produsaun ba prova sira**

Iha julgamentu, arguidu konfesa faktu sira iha akuzasaun prokuradór nian no deklara katak arrepende ninia hahalok. Arguidu mós deklara katak di'ak malu ona ho lezada to'o agora laiha ona problema seluk, foin primeiravés halo krime hasoru nia feen no promete sei la repete ninia hahalok ne'e hasoru lezada ka ema seluk iha futuru. Arguidu haktuir katak iha oan na'in lima, serbisu nu'udar seguransa guardamor ho vensimentu kada fulan US\$115.00.

Alende ne'e, lezada mós kontinua konfirma faktu sira iha akuzasaun no deklara katak depoisde akontesimentu ne'e lezada ba hela iha PRADET durante loron rua hafoin PRADET refere lezada ba hela iha Uma-Paz Oekusi durante loron rua mak foin re-entrega fali ba família. Lezada hatutan katak liu tiha loron rua mak moras sira ne'e rekopera no nia perdua ona arguidu to'o agora arguidu la baku ona lezada.

### **Alegasaun finál**

Prokurador konsidera arguidu ninia hahalok ne'e priense duni elementu krime ofensa ba integridade fízika simples ho natureza VD. Tanba ne'e, husu ba tribunál atu aplika pena prizaun fulan neen suspende ba tinan ida, nu'udar prevensaun ida ba arguidu atu la repete hikas ninia hahalok no ema seluk labele halo tuir iha futuru.

Entretantu, parte defeza husu ba tribunál atu aplika pena ne'ebé adekuaudu tuir arguidu nia sala ho konsiderasaun sira katak durante iha produsaun ba prova arguidu rasik konfesa faktu sira iha akuzasaun prokuradór nian no deklara katak arrepende ninia hahalok. Defeza haktuir tan katak di'ak malu ona ho



lezada to'o agora, foin primeiravés halo krime hasoru nia feen, promete sei la repete ninia hahalok ne'e hasoru lezada ka ema seluk iha futuru, iha oan na'in lima, no serbisu nu'udar seguransa guardamor ho vensimentu kada fulan US\$115.00.

### **Desizaun**

Depoide avalia ba faktu hotu tribunál prova katak arguidu basa dala rua iha lezada nia hasan parte karuk rezulta lezada sofre moras.

Bazeia ba faktu provadu sira ne'e no tetu mós ho sirkunstánsia agravante no atenuante sira ne'ebé mak haleu iha krime ne'e, nune'e tribunál konklui prosesu ne'e no kondena arguidu ho pena multa US\$30.00 ne'ebé kada lora arguidu sei selu 0,50 sentavus durante lora 60. Tribunál mós fiksa pena alternativa durante lora 40 iha prizaun, bainhira arguidu la kumpri pena multa refere.

### **7. Krime ofensa ba integridade física simples ho natureza VD**

Nú. Prosesu : 0064/23.OEPMK  
Kompozisaun Tribunál : Singulár  
Juis : Dr. Benjamin Barros  
Prokuradór : Dr. Claodino do Rosario  
Defeza : Dr. Calisto Tout  
Desizaun : Pena admoestasaun

Iha 25 Jullu 2024, Tribunál Judisiál Primeira Instánsia Oekusi prezide leitura sentensa ba krime ofensa ba integridade física simples ho natureza VD ne'ebé envolve arguidu JU hasoru nia Maun ACU, iha RAEOA.

### **Akuzasaun Prokuradór**

Prokuradór akuza katak iha 10 Outubru 2023, maizumenus iha oras tuku 21:00 kalan, arguidu buti lezadu nia kakorok dala ida rezulta lezadu sofre moras. Aktu ne'e akontese bainhira lezadu ho arguidu deskute malu kona-ba lezadu du'un arguidu mak foti nia osan iha kuartu laran. Kazu ne'e aneksu hamutuk ho relatóriu médiku hosi Ospital Referál Oekusi no fotografia kona-ba aktu violénsia ne'e hasai hosi polísia.

Prokuradór akuza arguidu kontra artigu 145 KP kona-ba krime ofensa ba integridade física simples ho moldura penál to'o tinan 3 ka multa, konjuga ho artigu 2, 3 (a), 35(b) no 36 LKVD.

### **Produsaun ba prova sira**

Iha julgamentu, arguidu konfesa integralmente ba faktu iha akuzasaun, arrepende ninia hahalok, foin primeiravés mai hatan iha tribunál. Arguidu haktuir tan katak depoide akontesimentu di'ak malu kedas ho lezadu no to'o agora laiha tan problema seluk. Arguidu serbisu hanesan to'os na'in laiha rendimentu fiksi kada fulan, sei klosan no promete sei larepete hikas nia hahalok ne'e iha futuru hasoru nia maun ka ema seluk.

Depoide rona deklarasaun hosi arguidu, prokuradór husu ba tribunál atu presinde tiha lezadu nia deklarasaun tanba arguidu konfesa faktu hotu iha

akuzasaun, nune'e prova ne'ebé presiza suficiente ona. Relasiona ho pedidu ne'e, defeza konkorda prokurador nia pedidu. Tribunál bazeia ba pedidu ne'e konklui hodi presinde lezadu nia deklarasaun.

### **Alegasaun finál**

Prokurador konsidera arguidu provadu prátika duni krime ofensa ba integridade fizika simples ho natureza VD tuir faktu sira iha akuzasaun. Prokurador reforsa liután katak tuir loloos arguidu hanesan alin tenke respeita ninia maun maibé pelukontráriu arguidu fila sai fali autór krime hasoru lezadu. Tanba ne'e, atu halo prevensaun atu krime refere labele akontese tan iha futuru, husu ba tribunál atu kondena arguidu ho pena multa.

Alende ne'e, defeza solisita ba tribunál atu kondena arguidu ho pena ne'ebé adekuaudu ho konsiderasaun sira katak iha produsaun ba prova arguidu konfesa integralmente, arrepende ninia hahalok. Defeza haktuir tan katak depoisde akontesimentu arguidu di'ak malu kedas ho lezadu hanesan maun no to'o agora laiha ona problema seluk tan, serbisu hanesan to'os na'in laiha rendimentu fiksi kada fulan, sei klosan no promete sei larepete hikas nia hahalok ne'e iha futuru hasoru nia maun ka ema seluk.

### **Desizaun**

Depoisde avalia ba faktu hotu, tribunál prova katak arguidu buti lezadu nia kakorok dala ida rezulta lezadu sofre moras.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok no di'ak malu ona ho lezada, nune'e tribunál konklui prosesu ne'e no kondena arguidu ho pena admoestasaun.

## **8. Krime ofensa integridade fizika simples ho natureza VD**

Nú. Prosesu	: 0245/23 OESIC
Kompozisaun Tribunál	: Singulár
Juis	: Dr. Benjamin Barros
Prokurador	: Dr. Mateus Nesi
Defeza	: Dr. Calisto Tout
Desizaun	: Absolve

Iha 25 Jullu 2024, Tribunál Judisiál Primeira Instansia Oekusi prezide leitura sentesa ba krime ofensa integridade fizika simples ho natureza VD ne'ebé envolve arguidu JNS hasoru nia feen, iha RAEOA.

### **Akuzasaun Prokurador**

Prokurador akuza katak iha 05 Outubru 2023, maizumenus iha oras tuku 09:00 kalan, arguidu tuku dala ida iha lezada nia reen-toos no kontinua rasta lezada hosi uma laran to'o iha estrada, rezulta lezada sofre moras. Depoisde akontesimentu ne'e, lezada ba hato'o keixa iha Polísia Eskuadra Pante-makasar. Kazu ne'e aneksu hamutuk ho relatóriu médiku hosi PRADET no fotografia kona-ba aktu violénsia ne'e hasai hosi polísia.

Prokuradór akuza arguidu kontra artigu 145 KP kona-ba krime ofensa ba integridada física simples ho moldura penál to'o tinan 3 ka multa, konjuga ho artigu 2, 3 (a), 35(b) no 36 LKVD.

### **Produsaun ba prova sira**

Iha prosesu julgamentu, arguidu konfesa parsialmente katak momentu ne'eba arguidu la tuku no larasta lezada hosi uma laran sai to'o estrada. Arguidu haktuir tan katak lezada moras fulan lotuk (moras mental) no momentu ne'eba lezada halai ba estrada mak arguidu dada fali ba uma laran. Arguidu haktuir tan katak lezada nia reen-toos kanek ne'e tanba lezada atu monu mak sira nia oan mane satan netik hodi kona iha semente, lezada moras desde tinan 2015 no ba halo tratamentu iha DHS hafoin polísia mai tula lezada ba iha Ospital.

Alende ne'e, lezada konfirma katak lezada moras fulan lotuk duni, momentu ne'eba moras sae nia maka halo lezada hakilar no tanis hafoin viziñu sira rona hodi kontaktu polísia mai lori lezada ba halo tratamentu iha ospital. Lezada konfirma liután katak lezada nia reen-toos metan no bubu ne'e kauza hosi nia moras mental hodi monu kona iha semente ne'ebé rai hela iha uma.

Testemuña RS nu'udar lezada nia oan mane deklarata katak nia inan moras fulan lotuk (moras mental) mak hakilar tanis, nune'e viziñu sira rona hotu hanoin arguidu nu'dar nia la'en mak baku, lezada hakilar tanis hafoin testemuña ho arguidu mak hamrik kaer lezada hafoin lezada nia reen-toos kona iha semente mak bubu no metan.

### **Alegasaun finál**

Prokuradór haktuir katak arguidu konfesa parsialmente ba faktu iha akuzasaun prokuradór nian. Prokuradór konfronta faktu ne'ebé hakerek iha akuzasaun no lezada mós halo duvida tanba deklarata la konsisten ba nia liafuan relasiona ho lezada nia moras mental. Iha prokuradór nia fatin lezada deklarata katak arguidu mak tuku no rasta sai lezada hosi uma laran, nune'e prokuradór konsidera hanesan impedimentu ida hodi aprofunda prova ho loloos no husu ba tribunál atu tetu ho didiak antes hatun desizaun.

Entretantu defeza husu ba tribunál atu absolve arguidu hosi aktu krime ne'e tanba laiha prova ne'ebé hatudu katak arguidu pratika krime hasoru lezada. Defeza reforsa liután katak iha prosesu julgamentu, arguidu konfesa parsialmente katak momentu ne'eba arguidu la tuku no larasta lezada hosi uma laran sai ba estrada, lezada antes ne'e moras fulan lotuk (moras mental) no momentu ne'eba lezada halai sai ba estrada mak arguidu dada fali ba uma laran.

### **Desizaun,**

Depoizde avalia ba faktu hotu tribunál konsidera katak laiha faktu sufisiénte ruma ne'ebé hatudu hodi prova arguidu nia aktu ne'e, nune'e tribunál konsidera faktu sira ne'ebé hakerek iha akuzasaun ne'e la provadu. Tanba ne'e, tribunál konklui prosesu ne'e no absolve arguidu hosi krime ne'e.

## **9. Krime abuzu seksuál ba menór**

Nú. Prosesu : 0045/21.PDOEC

Kompozisaun Tribunál : Kolektivu  
Juis : Dr. Benjamin Barros, Dr. Argentinho Luisa  
Maria Nunes no Dr. José Quintão  
Prokuradór : Dr. Mateus Nesi  
Defeza : Dr. Calisto Tout  
Desizaun : Prizaun tinan 7 no indeminizasaun sivil  
US\$5,000.00

Iha 26 Jullu 2024, Tribunál Judisiál Primeira Instansia Oekusi prezide leitura akordaun ba krime abuzu seksuál ba menór ne'ebé envolve arguidu MP tinan 19 hasoru nia prima ho idade tinan 13, iha RAEOA.

### **Akuzasaun Prokuradór**

Prokuradór akuza katak iha loran no fulan ne'ebé la apura, maibé iha Agostu 2019, arguidu tama ba uma kabuar laran no haree lezada toba dukur tiha ona, hafoin arguidu uja liman hodi taka lezada niaibun, lamas lezada nia susun, kolu lezada nia rounpa hodi hatama liman fuan ba lezada nia orgaun sensitivu hodi halo movimentasaun hatama hasai dala barak iha lezada nia orgaun sensitivu, rezulta lezada sente moras, la to'o iha ne'e de'it arguidu kontinua sae ba lezada nia leten hodi halo relasaun seksuál ho lezada to'o ezakula. Arguidu mós ameasa lezada katak *"kuandu ó hateten ba ó nia tiun ka ó nia inan aman sira, hau sei hein ó iha ai-laran hodi oho mate ó,"* nune'e lezada ta'uk la hatete sai ba ema ruma.

Iha Agostu to'o Dezembru 2019, arguidu halo relasaun seksuál ho lezada dala neen no iha Janeiru 2020, lezada gravida no partus bebe fetoda iha Setembru 2020.

Prokuradór akuza arguidu kontra artigu 177 (2) KP kona-ba abuzu seksuál ba menór ho moldura penál tinan 5 to'o tinan 15 prizaun.

### **Produsaun ba prova sira**

Iha prosesu julgamentu, arguidu nega faktu hotu ne'ebé hakerek iha akuzasaun prokuradór nian no deklarata katak nunka halo relasaun seksuál ho lezada tanba hanesan nia prima no hatene lezada moras bibi maten no arguidu nia aman mak fó ai-moruk tradisionál ba lezada hodi hemu, antes ne'e nunka problema ho lezada ho nia família sira.

Entretantu, lezada kontinua konfirma faktu hotu iha akuzasaun no deklarata katak iha akontesimentu ne'e lezada tama ba uma kabuar atu chas telefone depoisde chas tiha telefone lezada kontinua toba no bainhira lezada toba dukur tiha mak derepente arguidu tama tui ba dudu lezada nia ulun halo lezada monu ba rai, lezada moras bibi maten nune'e bainhira monu nia lahatene an, ho nune'e arguidu aproveita hasai lezada nia rounpa hodi halo relasaun seksuál ho lezada. Mezmu lezada moras hela bibi maten maibé hatene no koñese hela arguidu nia oin. Bainhira lezada hader mai sente moras raan sai hosi nia orgaun sensitivu no kona iha lezada nia kelen. Lezada haktuir tan katak antes ne'e lezada nunka toba ho mane seluk no depoisde isin rua sente moe ba viziñu, no arguidu sira fó multa karau tolu no tais fetoda ne'e la fó ba lezada maibé fó ba lezada nia família, lezada mós husu arguidu atu selu nia moe.

Testemuña AP nu'udar arguidu nia aman hanesan mós lezada nia tiu, haktuir katak momentu kuandu bolu lezada ho arguidu hodi husu tuir maibé arguidu hatan katak lahatene kona-ba akontesimentu ne'e no bainhira husu iha lezada dehan arguidu mak fó oan no ko'alia ho oin triste no tanis ho ida ne'e mak fó multa ba lezada ho nia inan aman sira, tais ne'e atu fó hatais fali nia feton no agora haree malu di'ak nafatin.

Testemuña DC hanesan lezada nia inan, laiha koñesimentu ba arguidu ho lezada halo relasaun seksuál, maibé hatene bainhira liu fulan haat haree lezada toba hela de'it no buka mak has hodi han, nune'e testemuña husu ba lezada katak "*ó keta isin rua karik*", komesa hosi ne'e sasin nu'udar inan deskonfia lezada no loke lezada nia ropa haree nia kabun no haree nia susun sae boot ona, nune'e testemuña husu lezada se mak fó isin rua, hafoin lezada hatan katak arguidu hodi halo testemuña hakfodak, hirus nusa mak ho hau nia maun nia oan fali. Testemuña depoimenta liután katak iha momentu ne'eba kedas testemuña bolu arguidu nia inan ho aman tuur hamutuk hodi ko'alia hafoin arguidu ho nia familía sira konkorda atu fó multa karau tolu no tais feto ida ba lezada.

### **Alegasaun final**

Prokuradór haktuir katak mezmú arguidu nega faktu hotu iha akuzasaun, maibé prokuradór konsidera hahalok arguidu provadu tanba kuandu testemuña nu'udar lezada nia inan hatene no bolu arguidu nia inan/aman tu'ur ko'alia no sira aseita atu fó multa ba lezada ho karau tolu ho tais feto ida. Prokuradór reforsa liután katak arguidu aproveita lezada nia moras bibi maten hodi halo abuzu seksuál hasoru lezada, nune'e husu ba tribunál fó pena prizaun tinan 15 ba arguidu atu eduka nia labele repete tan hahalok ne'e ba ema seluk, arguidu hatene hela lezada moras no maibé halo terus liután lezada.

Entretantu, defeza solisita ba tribunál atu absolve arguidu hosi aktu krime ne'e tanba defeza haree no intende katak laiha prova suficiénte arguidu pratika aktu krime abuzu seksuál ba menór hasoru lezada, tanba arguidu konsidera lezada hanesan nia prima rasik, maibé karik tribunál iha hanoin seluk parte defeza husu justisa tuir arguidu nia sala tanba antes ne'e mós arguidu ho nia familía aseita atu multa ba lezada ho karau tolu no tais feto ida hodi hatais hikas fali lezada hanesan nia prima rasik.

### **Desizaun,**

Depoisde avalia faktu hotu, tribunál prova katak arguidu uja liman hodi taka lezada niaibun, lamas lezada nia susun, kolu lezada nia roupa hodi hatama liman fuan ba lezada nia orgaun sensitivu hodi halo movimentasaun hatama hasai dala barak iha lezada nia orgaun sensitivu, resulta lezada sente moras, la to'o iha ne'e de'it arguidu kontinua sae ba lezada nia leten hodi halo relasaun seksuál ho lezada to'o ezakula. Arguidu mós ameasa lezada katak "*kuandu ó hateten ba ó nia tiun ka ó nia inan aman sira, hau sei hein ó iha ai-laran hodi oho mate ó,*" nune'e lezada ta'uk la hatete sai ba ema ruma.

Iha Agostu to'o Dezembru 2019, arguidu halo relasaun seksuál ho lezada dala neen no iha Janeiru 2020, lezada grávida no partus bebe feto ida iha Setembru 2020.

Bazeia ba faktu provadu hirak ne'e no tetu mós ho sirkunstánsia agravante no atenuante sira ne'ebé halaeu krime ne'e, nune'e tribunál konklui prosesu ne'e no kondena arguidu ho pena prizaun tinan hitu no selu indemnizasaun sivíl ba lezada US\$5,000.00.

#### **10. Krime ofensa ba integridade fízika simples ho natureza VD**

Nú. Prosesu : 0072/23.OEPMK  
Kompozisaun Tribunál : Singulár  
Juis : Dr. Argentinho Luisa Maria Nunes  
Prokuradór : Dr. Claodino do Rosario  
Defeza : Dr. Afonso Gomes Fatima  
Desizaun : Pena prizaun tinan 1 suspende ba tinan 1

Iha 30 Jullu 2024, Tribunál Judisiál Primeira Instánsia Oekusi prezide leitura sentensa ba krime ofensa ba integridade fízika simples ho natureza VD ne'ebé envolve arguidu RA hasoru nia feen, iha RAEOA.

#### **Akuzasaun Prokuradór**

Prokuradór akuza katak iha 03 Dezembru 2023, maizumenus iha oras tuku 15:30 lokraik, arguidu tebe lezada dala ida iha kanotak parte loos no basa dala ida iha lezada nia hasan parte loos rezulta lezada sofre moras. Aktu ne'e akontese bainhira lezada ho arguidu deskute malu atu ba partisipa iha lia moris hosi parte lezada nian. Kazu ne'e aneksa hamutuk ho relatóriu médiku hosi PRADET no fotografia kona-ba aktu violénsia ne'e hasai hosi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

#### **Produsaun ba prova sira**

Iha julgamentu, arguidu konfesa faktu sira ne'ebé hakerek ona iha akuzasaun no deklara katak arrepende nia hahalok di'ak malu ona. Arguidu mós deklara katak depoisde akontesimentu ne'e, arguidu ho lezada kontinua moris hamutuk iha uma ida, iha oan na'in ida, foin primeiravés halo krime no mai hatan iha tribunál, arguidu serbisu hanesan to'os na'in, nune'e laiha rendimentu fiksi kada fulan no promete sei larepete hikas hahalok ne'e iha futuru hasoru nia feen ka ema seluk.

Alende ne'e, lezada mós kontinua konfirma faktu sira iha akuzasaun no konfirma mós ho arguidu nia deklarasaun katak depoisde akontesimentu ne'e to'o agora sira laiha ona problema seluk tan.

#### **Alegasaun finál**

Prokuradór konsidera arguidu provadu prátika krime tuir faktu sira iha akuzasaun, bazeia ba konfisaun arguidu nian katak tebe lezada dala ida iha kanotak parte loos no basa dala ida iha lezada nia hasan parte loos rezulta

lezada sofre moras. Nune'e, atu halo prevensaun ba krime refere, husu ba tribunál atu kondena arguidu ho pena multa.

Entretantu, defeza husu ba tribunál atu kondena arguidu ho pena ne'ebé adekuaudu ho konsiderasaun sira katak arguidu konfesa, arrepende nia hahalok diak malu ona ho lezada no foin primeiravés mai hatan iha tribunál. Arguidu serbisu hanesan to'os na'in laiha rendimentu fiksi kada fulan no promete sei larepete hikas hahalok ne'e iha futuru hasoru nia feen ka ema seluk.

### **Desizaun**

Depoisde avalia faktu hotu tribunál prova katak arguidu tebe lezada dala ida iha kanotak parte loos no basa dala ida iha lezada nia hasan parte loos rezulta lezada sofre moras.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepende nia hahalok, di'ak malu ona ho lezada, foin primeiravés mai hatan iha tribunál no promete sei la komete tan krime hanesan hasoru lezada ka ema seluk iha futuru, nune'e tribunál konklui prosesu ne'e no kondena arguidu ho pena prizaun tinan ida suspende ba tinan ida.

### **11. Krime ofensa ba integridade fízika simples ho natureza VD**

Nú. Prosesu : 0026/23.OEPMK  
Kompozisaun Tribunál : Singulár  
Juis : Dr. Argentino Luisa Maria Nunes  
Prokuradór : Dr. Claodino do Rosario  
Defeza : Dr. Calisto Tout  
Desizaun : Pena multa US\$45.00

Iha 31 Jullu 2024, Tribunál Judisiál Primeira Instansia Oekusi prezide leitura sentesa ba krime ofensa ba integridade fízika simples ho natureza VD ne'ebé envolve arguida FDG hasoru nia la'en, iha RAEOA.

### **Akuzasaun Prokuradór**

Prokuradór akuza katak iha 16 Maiu 2023, maizumenus iha oras tuku 12:00 kalan, arguida uza sukaer sanak baku dala ida iha lezadu nia reen-toos, baku dala ida iha hasan parte karuk no baku dala ida iha kotuk laran. Konsekuensia hosi arguidu nia aktu ne'e rezulta lezadu hetan kanek ki'ik no sofre moras. Aktu ne'e akontese bainhira arguida haruka lezadu atu ba hola ai-moruk ba sira nia oan maibé lezadu ba fila lalori ai-moruk. Kazu ne'e aneksa hamutuk ho relatóriu médiku hosi PRADET no fotografia sira hasai hosi Polísia.

Prokuradór akuza arguidu kontra artigu 145 KP kona-ba krime ofensa ba integridade fízika simples ho moldura penál to'o tinan 3 ka multa, konjuga ho artigu 2, 3 (a), 35(b) no 36 LKVD.

### **Produsan ba prova sira**

Iha julgamentu arguida konfesa faktu hotu iha akuzasaun, arrepende ninia hahalok no deklarata katak depoisde akontesimentu ne'e liu loron tolu sira di'ak malu fali no arguida husu ona deskulpa ba lezadu no promete iha futuru sei la

repete tan nia hahalok ne'e hasoru lezadu no ema seluk, iha oan na'in rua no laiha rendimentu fiksi kada fulan.

Alende ne'e, lezadu kontinua konfirma faktu sira iha akuzasaun no konfirma mós arguida nia deklarasaun.

### **Alegasaun finál**

Prokuradór konsidera arguida provadu prátika krime tuir faktu sira iha akuzasaun, bazeia ba konfisaun arguida nian no konfirma mós hosi lezadu, nune'e atu halo prevensaun ba krime refere, husu ba tribunál atu kondena arguida ho pena multa.

Entretantu, defeza husu ba tribunál atu kondena arguida ho pena ne'ebé kmaan ho konsiderasaun katak, arguida konfesa, arrepende ninia hahalok, di'ak malu ona ho lezadu no promete sei la repete tan ninia hahalok ne'e iha futuru. Iha oan na'in rua no laiha rendimentu fiksi kada fulan.

### **Desizaun**

Depoizde avalia faktu hotu tribunál prova katak arguida uza sukaer sanak baku dala ida iha lezadu nia reen-toos, baku dala ida iha hasan parte karuk no baku dala ida iha kotuk laran, rezulta lezadu hetan kanek kois no sofre moras.

Bazeia ba faktu provadu sira ne'e no tetu mós ho sirkunstánsia atenuante sira hanesan arguida konfesa, arrepende ninia hahalok, di'ak malu ona ho arguidu no promete sei la repete tan krime hanesan iha futuru, nune'e tribunál konklui prosesu ne'e no kondena arguida ho pena multa US\$45.00, ne'ebé kada lora arguida sei selu 0,50 sentavus durante lora 90. Tribunál mós fiksa pena alternativa durante lora 60 iha prizaun, bainhira arguida la kumpri pena multa refere.

## **12. Krime ofensa ba integridade fízika simples ho natureza VD**

Nú. Prosesu : 0275/23.OESIC.  
Kompozisaun Tribunál : Singulár  
Juis : Dr. Argentino Luisa Maria Nunes  
Prokuradór : Dr. Claodino do Rosario  
Defeza : Dr. Calisto Tout  
Desizaun : Pena admoestasaun

Iha 31 Jullu 2024, Tribunál Judisiál Primeira Instansia Oekusi prezide leitura sentesa ba krime ofensa ba integridade fízika simples ho natureza VD ne'ebé envolve arguidu NTF hasoru nia feen, iha RAEOA.

### **Akuzasaun Prokuradór**

Prokuradór akuza katak iha 11 Novembru 2023, maizumenus iha oras tuku 12:00 meudia, arguidu basa dala ida iha lezada nia inus kauza kanek, raan sai, bubu, mean no moras. Aktu ne'e akontese bainhira lezada haruka arguidu foti modo atu han, maibé arguidu soe deit iha meza no lezada ko'alia hakilar hasoru arguidu. Kazu ne'e aneksa hamutuk ho relatóriu médiku hosi PRADET no fotografia sira hasai hosi Polísia.



Prokuradór akuza arguidu kontra artigu 145 KP kona-ba krime ofensa ba integridada física simples ho moldura penál to'o tinan 3 ka multa, konjuga ho artigu 2, 3 (a), 35(b) no 36 LKVD.

### **Produsan ba prova sira**

Iha prosesu julgamentu arguidu konfesa faktu sira hotu iha akuzasaun prokuradór nian, husu deskulpa ba lezada no rezolve ona tuir lisan Timor nian arguidu fó tais feto ida no osan US\$100.00 ba lezada hanesan taka fali lezada nia kanek, foin primeiravés mai iha tribunál, promete sei larepete hikas nia hahalok ne'e iha futuro, arguidu serbisu hanesan to'os nain laiha rendimentu fiksi kada fulan no iha oan nain tolu.

Alende ne'e, lezada kontinua konfirma faktu hotu iha akuzasaun no konfirma mós arguidu nia deklarasaun katak sira dame malu ona no arguidu husu deskulpa ba lezada hodi fó tais feto ida no osan US\$100.00 ba lezada no to'o agora laiha ona problema seluk.

### **Alegasaun finál**

Prokuradór konsidera arguidu provadu komete krime hasoru lezada, bazeia ba konfisaun arguidu nian no konfirma mós hosi lezada, mezmu sira di'ak malu ona prokuradór husu ba tribunál atu kondena arguidu ho pena multa.

Entretantu, defeza solisita ba tribunál atu kondena arguidu ho pena multa tuir arguidu nia sala ho konsiderasaun sira katak arguidu konfesa integrelemnete, husu deskulpa ba lezada no rezolve ona tuir lisan Timor nian arguidu fó tais feto ida no osan US\$100.00 ba lezada hanesan taka fali lezada nia kanek, foin primeiravés mai iha tribunál, promete sei la repete hikas nia hahalok ne'e iha futuro, arguidu serbisu hanesan to'os nain laiha rendimentu fiksi kada fulan no iha oan nain tolu.

### **Desizaun**

Depoizde avalia ba faktu hotu, tribunál prova katak arguidu basa dala ida iha lezada nia inus kauza kanek, raan sai, bubu, mean no moras.

Bazeia ba faktu sira provadu hirak ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok, diak malu ona no rezolve tuir lisan Timor nian arguidu fó tais feto ida, osan US\$100.00 ba lezada no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena admoestasaun.

### **Atu hetan informasaun kompleitu, favór kontaktu:**

Ana Paula Marçal

Diretora Ezekutiva JSMP

Diresaun e-mail: [ana@jsmp.tl](mailto:ana@jsmp.tl)

Telefone: (+670) 33238883 | 77040735

Website: <https://jsmp.tl>

[info@jsmp.tl](mailto:info@jsmp.tl)